

N A C R T

Z A K O N
O TURISTIČKIM ZAJEDNICAMA U SREDNJOBOSANSKOM KANTONU

Travnik, maj / svibanj 2018. godine

Na osnovu člana 18. stav (1) tačka k., člana 19. stav (1) tačka g. i člana 41. stav 1. tačka c. Ustava Srednjobosanskog kantona („Službene novine Srednjobosanskog kantona“ broj 1/97, 5/97,6/97,2/98,7/98 - ispravka teksta, 8/98,10/00,8/03,2/04 i 14/04), na prijedlog Vlade Kantona,Skupština Srednjobosanskog kantona na _____ sjednici održanoj _____ 2018.godine donijela je

ZAKON O TURISTIČKIM ZAJEDNICAMA SREDNJOBOSANSKOG KANTONA

POGLAVLJE I. OSNOVNE ODREDBE

Član 1. (Predmet zakona)

Ovim zakonom uređuje se osnivanje i način rada turističkih zajednica (u daljem tekstu: turističkih zajednica),te način njihove organizacije,finansiranja,privređivanja, kao i kriteriji za kategorisanje turističkih mjesta.

Član 2. (Gramatička terminologija)

Gramatička terminologija korištenja muškog i ženskog roda za pojmove u ovom Zakonu, podrazumijeva oba roda.

Član 3. (Pravni status)

- (1) Turistička zajednica je pravna osoba. Prava i obaveze turističke zajednice utvrđuju se ovim zakonom i Statutom turističke zajednice.
- (2) Svojestvo pravne osobe turistička zajednica stječe danom upisa u Sudski registar (u daljem tekstu: Registar), kod nadležnog suda.
- (3) Prijavu za upis u Upisnik turističkih zajednica (u daljem tekstu: Upisnik), kao i sve upisane promjene dužno je podnijeti u roku od 15 dana lice ovlašteno osnivačkim aktom.
- (4) Upisnik vodi Ministarstvo privrede Srednjobosanskog kantona (u daljem tekstu: Ministarstvo).
- (5) Oblik i sadržaj obrasca prijave za Upisnik i sadržaj i način vođenja Upisnika propisati će Ministar.

Član 4.
(Ciljevi osnivanja)

- (1) Turističke zajednice se osnivaju radi razvoja, unapređenja i promicanja turizma na području lokalnih zajednica kao i Srednjobosanskog kantona (u daljem tekstu:Kanton) u cjelini, i privrednih interesa pravnih i fizičkih lica koja pružaju ugostiteljske i druge turističke usluge ili obavljaju drugu djelatnost neposredno povezanu s turizmom, na način da upravljaju destinacijom na nivou za koji su osnovane.
- (2) Zajednički ciljevi osnivanja turističkih zajednice su:
 - a) unapređivanje općih uslova boravka turista, posebno podizanju kvaliteta turističkih i drugih komplementarnih usluga, očuvanje i stvaranje prepoznatljivog i privlačnog turističkog ambijenta i osiguranjem turističkog gostoprimstva na području za koje su osnovane,
 - b) promocija turističkog proizvoda područja za koje su osnovane, u skladu sa sistemom promicanja turizma i njegovim posebnim i općim zadaćama od nivoa općine/grada do nivoa Kantona,
 - c) razvijanje svijesti o važnosti, privrednim, društvenim i drugim efektima turizma, te o potrebi i važnosti očuvanja i unaprijeđenja svih elemenata turističkog proizvoda određenog područja, a posebno zaštite okoliša,
 - d) podsticanje razvoja turističke infrastrukture i pružanja informacija turistima;
 - e) promocija turističkog proizvoda područja za koje su osnovane.

Član 5.
(Djelatnost turističkih zajednica)

- (1) Djelatnost turističkih zajednica se zasniva na načelu ostvarivanja javnog interesa u oblasti turizma, a čiji osnovni cilj nije ostvarivanje neposredne dobiti.
- (2) Izuzetno od stava (1) ovog člana, turističke zajednice mogu da:
 - a) upravljaju dobrima i resursima koji su im dati na upravljanje odlukom osnivača u skladu sa posebnim propisima (izletišta, lovišta, parkovi, plaže, jezera, rijeke, prirodno i kulturno- historijsko naslijeđe),
 - b) organizuju manifestacije i priredbe,
 - c) objavljuju turističke komercijalne oglase u oglasnim medijima koji su im dati na upravljanje odlukom osnivača,
 - d) prodaju suvenire, ulaznice, turističke karte i brošure, osim sopstvenog promotivnog materijala,
 - e) obavljaju i druge poslove od javnog interesa koji su u funkciji razvoja turizma i koji nisu u suprotnosti sa ovim zakonom i drugim propisima.

Član 6.
(Javnost rada)

- (1) Rad turističkih zajednice je javan.
- (2) Javnost rada osigurava se i ostvaruje na način propisan Statutom turističke zajednice.

Član 7.
(Sistem turističkih zajednica)

Turistička zajednica osniva se za područje:

- a) Kantona, kao Turistička zajednica Srednjobosanskog kantona, (u daljem tekstu: Turistička zajednica Kantona) i
- b) općine/grada, kao Turistička zajednica općine/grada.

Član 8.
(Članovi turističke zajednice)

- (1) Turistička zajednica ima obavezne i počasne članove.
- (2) Osim članova iz stava (1) ovoga člana, Turistička zajednica može imati i dobrovoljne članove.
- (3) Skupština turističke zajednice, na prijedlog turističkog vijeća, može osobe, posebno zaslužne za razvoj i promicanje turizma, imenovati počasnim članovima turističke zajednice.
- (4) Počasni članovi turističke zajednice, ne mogu birati niti biti birani u tijela turističke zajednice.

Član 9.
(Statut turističke zajednice)

- (1) Prava i obaveze turističkih zajednica utvrđuju se ovim zakonom i statutom turističke zajednice.
- (2) Statutom turističke zajednice uređuje se:
 - a) naziv i sjedište turističke zajednice,
 - b) zadaci turističke zajednice,
 - c) prava, obaveze i odgovornosti članova turističke zajednice,
 - d) djelokrug,
 - e) organizacija, način izbora i opoziva, te mandat članova tijela turističke zajednice,
 - f) način predstavljanja i zastupanja turističke zajednice,
 - g) način odlučivanja u turističkoj zajednici,
 - h) način ostvarivanja javnosti rada,
 - i) način donošenja statuta i drugih općih akata,
 - j) imovina, način stjecanja imovine i raspolaganja imovinom,
 - k) postupak s imovinom u slučaju prestanka turističke zajednice.
- (3) Turistička zajednica donosi statut i odluku o izmjenama i dopunama statuta uz prethodnu saglasnost nadležne općinske/gradske službe odnosno Ministarstva.

- (4) Statut i njegove izmjene turističkih zajednica općina objavljuju se u Službenim novinama općine/grada, a statut Turističke zajednice Kantona u Službenim novinama Srednjobosanskog kantona.

Član 10
(Tijela Turističke zajednice)

- (1) Tijela turističke zajednice su;
- a) skupština,
 - b) nadzorni odbor,
 - c) turističko vijeće,
 - d) Predsjednik turističke zajednice-alternativa.
- (2) Članovi tijela odgovorni su za zakonito i savjesno obavljanje svojih dužnosti.
- (3) Mandat članova tijela turističke zajednice traje četiri godine, a članovi mogu biti ponovno birani, odnosno imenovani na još jedan mandat.
- (4) U slučaju prestanka mandata člana organa prije isteka vremena na koje je član izabran, novi član se bira ili delegira na vrijeme do isteka mandata na koji je izabran prethodnik.

Član 11.
(Skupština)

- (1) Skupština turističke zajednice najviše je tijelo upravljanja u turističkoj zajednici.
- (2) Skupštinu turističke zajednice čine članovi, odnosno predstavnici članova turističke zajednice.
- (3) Skupština turističke zajednice:
- a) donosi statut turističke zajednice,
 - b) donosi poslovnik o radu skupštine,
 - c) bira i razrješava predsjedavajućeg skupštine turističke zajednice iz reda članova skupštine,
 - d) odlučuje o izboru i razrješenju članova turističkog vijeća,
 - e) odlučuje o izboru i razrješenju članova nadzornog odbora,
 - f) donosi godišnji program rada i godišnji finansijski plan turističke zajednice,
 - g) donosi odluku o osnivanju i organizaciji turističkog ureda,
 - h) prihvata godišnje izvještaje koje podnosi turističko vijeće i nadzorni odbor,
 - i) donosi odluke i rješava o drugim pitanjima kada je to predviđeno propisima i statutom turističke zajednice.
- (4) Predsjedavajući skupštine turističke zajednice saziva i predsjedava sjednicama skupštine turističke zajednice i za svoj rad odgovara skupštini turističke zajednice.
- (5) Skupština turističke zajednice održava se najmanje dva puta godišnje.

Član 12.

(Članovi nadzornog odbora)

- (1) Nadzorni odbor turističke zajednice ima najmanje tri člana, a čine ga:
 - a) članovi koje bira skupština turističke zajednice i
 - b) član kojeg delegira osnivač.
- (2) Statutom se može odrediti veći broj članova nadzornog odbora, s tim da njihov broj mora biti neparan.
- (3) Član nadzornog odbora ne može biti član turističkog vijeća turističke zajednice.
- (4) Nadzorni odbor iz redova svojih članova bira predsjedavajućeg.
- (5) Nadzorni odbor donosi poslovnik o svom radu.

Član 13.

(Nadzorni odbor)

- (1) Nadzorni odbor nadzire:
 - a) vođenje poslova turističke zajednice,
 - b) materijalno i finansijsko poslovanje i raspolaganje sredstvima turističke zajednice,
 - c) izvršenje i provedbu programa rada i finansijskog plana turističke zajednice.
- (2) O obavljenom nadzoru, nadzorni odbor podnosi pisani izvještaj turističkom vijeću i skupštini turističke zajednice.
- (3) Nadzorni odbor provodi nadzor iz stava (1) ovog člana najmanje četiri puta godišnje.

Član 14.

(Turističko vijeće)

- (1) Turističko vijeće je izvršno tijelo skupštine turističke zajednice.
- (2) Turističko vijeće obavlja poslove utvrđene ovim zakonom i statutom turističke zajednice.
- (3) Turističko vijeće je odgovorno skupštini turističke zajednice.
- (4) Turističko vijeće može pravovaljano odlučivati ukoliko je na sjednici prisutno više od polovine članova vijeća.
- (5) Turističko vijeće odlučuje većinom glasova prisutnih članova.
- (6) Turističko vijeće turističke zajednice:
 - a) provodi odluke i zaključke skupštine turističke zajednice,
 - b) predlaže skupštini osnovne smjernice i godišnji program rada, finansijski plan turističke zajednice,
 - c) podnosi izvještaj o izvršenju programa rada i finansijskom poslovanju turističke zajednice,
 - d) upravlja imovinom turističke zajednice u skladu sa ovim zakonom i statutom
 - e) donosi opće akte za stručnu službu- turistički ured turističke zajednice,
 - f) provodi proceduru izbora direktora turističkog ureda na temelju javnog konkursa,
 - g) donosi poslovnik o radu,
 - h) obavlja i druge poslove utvrđene ovim zakonom i statutom turističke zajednice.
- (7) Turističko vijeće ima predsjednika turističkog vijeća koji predstavlja turističku zajednicu.
- (8) Dužnost predsjednika turističkog vijeća turističke zajednice općine/grada obavlja lice koje imenuje načelnik/gradonačelnik, uz saglasnost Općinskog vijeća.

(9) Dužnost predsjednika turističkog vijeća Turističke zajednice Kantona obavlja lice koje imenuje Ministar, uz saglasnost Vlade Kantona.

(10) Predsjednik turističkog vijeća turističke zajednice saziva i presjedava sjednicama turističkog vijeća i za svoj rad odgovara osnivaču i skupštini turističke zajednice.

Član 15. (Turistički ured)

- (1) Turistička zajednica ima stručnu službu.
- (2) Stručnu službu turističke zajednice, kao turistički ured, osniva skupština turističke zajednice.
- (3) Turističko vijeće pravilnikom propisuje posebne uslove u pogledu stručne spreme, radnog iskustva, znanja jezika i drugih posebnih znanja i sposobnosti, koje moraju ispunjavati zaposleni u turističkom uredu.
- (4) Na pravni status zaposlenih u turističkom uredu, uslove za stupanje na rad i ostala pitanja u vezi sa njihovim radom, odgovarajuće se primjenjuju opći propisi o radu, ako ovim zakonom nije drugačije propisano.
- (5) U turističkom uredu obavljaju se stručni i administrativni poslovi vezani za zadaće turističke zajednice utvrđene ovim zakonom i statutom turističke zajednice.

Član 16. (Direktor turističkog ureda)

- (1) Turistički ured ima direktora, koji se imenuje na period od četiri godine, putem javnog konkursa, te može biti ponovno imenovan.
- (2) Direktor turističkog ureda zastupa turističku zajednicu, organizuje i rukovodi radom i poslovanjem turističkog ureda, provodi odluke turističkog vijeća i u granicama utvrđenih ovlasti odgovoran je za poslovanje turističke zajednice i zakonitosti rada turističkog ureda.
- (3) Turističku zajednicu do izbora direktora turističkog ureda zastupa predsjednik turističkog vijeća turističke zajednice.
- (4) Direktor turističkog ureda i drugi radnici zaposleni u turističkom uredu ne mogu biti članovi skupštine, nadzornog odbora ili turističkog vijeća.
- (5) Direktora turističke zajednice općine/grada imenuje općinski načelnik/gradonačelnik na prijedlog turističkog vijeća.
- (6) Direktora Turističke zajednice Kantona imenuje Vlada na prijedlog turističkog vijeća.
- (7) Sjedište turističkog ureda je u sjedištu turističke zajednice.

POGLAVLJE II. TURISTIČKA ZAJEDNICA KANTONA

Član 17.
(Osnivanje Turističke zajednice Kantona)

- (1) Za područje Kantona se osniva Turistička zajednica kantona .
- (2) Odluku o osnivanju Turističke zajednice, na prijedlog Vlade donosi Skupština Srednjobosanskog kantona.
- (3) Pripremne radnje za osnivanje Turističke zajednice Kantona i sazivanje osnivačke skupštine obavlja Ministarstvo.
- (4) Sjedište Turističke zajednice Kantona je u Travniku.
- (5) Prijavu za upis turističke zajednice u Upisnik, Turistička zajednica Kantona je obavezna podnijeti Ministarstvu u roku od 15 dana od dana osnivanja turističke zajednice.

Član 18.
(Zadaci Turističke zajednice Kantona)

Osnovni zadaci Turističke zajednice Kantona su sljedeći:

- a) razvijanje i promocija turizma u Kantona
- b) objedinjava turističku ponudu Kantona,
- c) organizuje i provodi operativna istraživanja tržišta za potrebe promocije turizma Kantona,
- d) izrađuje programe i planove promocije turističkog proizvoda vodeći računa o specifičnostima svoga turističkog područja, a u skladu sa strategijom razvoja turizma i marketinškoj strategiji turističkog proizvoda Kantona,
- e) organizuje, provodi i nadzire sve radnje promocije turističkog proizvoda Kantona u skladu sa osnovnim smjernicama skupštine Turističke zajednice Kantona, godišnjem programu rada i finansijskom planu Turističke zajednice Kantona,
- f) organizovanje jedinstvenog turističkog informacijskog sistema Kantona, u skladu sa sistemom Federacije, BiH i europskim standardima,
- g) obavlja opću i turističku djelatnost, informativnu djelatnost, prikuplja i sređuje sve vrste turističkih informacija i stavlja ih na raspolaganje javnosti,
- h) potiče i koordinira poticaje svih turističkih zajednica općina, kao i svih privrednih i drugih subjekata u turizmu, koji djeluju neposredno i posredno na unaprjeđenje i promociju turizma u Kantonu,
- i) saraduje sa nacionalnim turističkim organizacijama drugih zemalja, specijaliziranim međunarodnim regionalnim turističkim organizacijama, te poduzima mjere uključivanja u različite multinacionalne i regionalne promotivne turističke projekte i programe,
- j) usklađuje interese, pruža potporu i koordinira načine izvršenja svih planskih i programskih zadataka turističkih zajednica općina/gradova,
- k) poduzima mjere i aktivnosti za razvoj i promicanje turizma u turistički nerazvijenim dijelovima Kantona,
- l) upravljanje javnom turističkom infrastrukturom danom na upravljanje od strane Kantona,
- m) radi na promociji, plasmanu i podršci realizacije turističkog proizvoda, kao i pojedinih njegovih dijelova, vrijednosti i usluga, koji čine integralni turistički proizvod,

- n) vrši promociju plansko-projektne, plansko-razvojne i investicione dokumentacije iz oblasti turizma i njima komplementarnih djelatnosti,
- o) preduzima mjere i aktivnosti na kreiranju turističkog proizvoda i turističkog imidža Kantona, kao i radnje na formiranju marke turističkog proizvoda destinacije,
- p) organizovanje jedinstvenog turističkog informacijskog sistema, sistema prijave i odjave turista i statističke obrade prema turističkim zajednicama nižeg nivoa organizovanja,
- q) radi na istraživanju turističkog tržišta u cilju pozicioniranja turističkog proizvoda na turističkom tržištu,
- r) prati stanje na turističkom tržištu u cilju pravovremenog donošenja odgovarajućih odluka,
- s) radi na promociji turističke ponude Kantona u zemlji i inostranstvu,
- t) obavljanje informativnih poslova u vezi s turističkom ponudom,
- u) koordinira na poslovima razvoja turizma na lokalnom, entitetskom i državnom nivou,
- v) radi na razvoju gostoprimstva, očuvanju prirodnih i kulturnih vrijednosti i unapređenju ekološke zaštite prostora na kome djeluje turistička zajednica,
- w) obavlja i druge poslove kojima se osigurava uspješno djelovanje sistema turističkih zajednica općina i provedba svih postavljenih planova, programa i zadaća.

Član 19.

(Članovi Turističke zajednice Kantona)

- (1) Obavezni članovi Turističke zajednice Kantona su:
 - a) turističke zajednice općina/gradova i
 - b) sve pravne i fizičke osobe, koje na području Kantona imaju svoje sjedište ili podružnicu, pogon, filijalu ili sl. (u daljem tekstu: poslovna jedinica), a koje ostvaruju prihod obavljanjem ugostiteljskih i turističkih, te s turizmom neposredno povezanih djelatnosti.
- (2) Djelatnosti iz stava (1) tačka (b) ovog člana utvrđuje Ministar Pravilnikom, u skladu sa standardnom klasifikacijom djelatnosti u Bosni i Hercegovini.
- (3) Obavezno članstvo u Turističkoj zajednici Kantona počinje danom osnivanja Turističke zajednice Kantona ili danom početka obavljanja djelatnosti pravne i fizičke osobe na području Kantona.
- (4) Na prestanak obaveznog članstva u Turističkoj zajednici Kantona ne utječe privremena obustava djelatnosti kao ni sezonsko obavljanje djelatnosti.
- (5) Obavezno članstvo u Turističkoj zajednici Kantona prestaje prestankom rada Turističke zajednice Kantona, ili prestankom obavljanja djelatnosti.
- (6) Obavezni članovi Turističke zajednice, odnosno njihovi predstavnici, mogu birati i biti birani u tijela Turističke zajednice Kantona.
- (7) Kao dobrovoljni članovi u Turističku zajednicu Kantona mogu se učlaniti pravne i fizičke osobe koje nisu članovi Turističke zajednice Kantona u skladu sa stavom (1) ovoga zakona.

Član 20.

(Skupština Turističke zajednice Kantona)

- (1) Skupštinu Turističke zajednice Kantona čine predstavnici turističkih zajednica općine/grada, predstavnici Ministarstva, predstavnici pravnih i fizičkih osoba, te privrednih asocijacija i društava koji su članovi Turističke zajednice Kantona, na način i pod uslovima utvrđenim Statutom.
- (2) U slučaju da nije formirana turistička zajednica općine/grada na nekom području, jednog člana Skupštine Turističke zajednice Kantona delegira načelnik/gradonačelnik iz te općine/grada.
- (3) Broj predstavnika članova u skupštini Turističke zajednice Kantona utvrđuje se Statutom.
- (4) Svaka turistička zajednica općine/grada mora biti zastupljena najmanje s jednim predstavnikom.
- (5) Predstavnici pravnih i fizičkih osoba, te privrednih asocijacija i društava koji su članovi Turističke zajednice Kantona mogu biti izabrani u skupštinu, ovisno o udjelu u finansiranju Turističke zajednice Kantona.
- (6) Udio u finansiranju iz stava (5) ovoga člana utvrđuje se prema prihodu u godini koja prethodi godini u kojoj se provode izbori za skupštinu Turističke zajednice Kantona.

Član 21.

(Turističko vijeće Turističke zajednice Kantona)

- (1) Turističko vijeće Turističke zajednice Kantona ima predsjednika i šest članova, od kojih šest članova bira Skupština Turističke zajednice Kantona, a jednog člana delegira Ministarstvo.
- (2) Pored nadležnosti Turističkog vijeća iz člana 14. ovog zakona, Turističko vijeće Turističke zajednice Kantona:
 - a) daje saglasnost o zapošljavanju ostalih uposlenika,
 - b) donosi koncepciju i strategiju marketinga turizma Kantona,
 - c) predlaže smjernice za provedbu programa promocije turizma u turističkim općinama,
 - d) obavlja i druge poslove koje mu povjeri skupština Turističke zajednice Kantona.
- (3) Turističko vijeće Turističke zajednice Kantona saziva se najmanje svaka dva mjeseca ili kada to zatraži najmanje jedna trećina članova Turističkog vijeća.

Član 22.

(Direktor turističkog ureda Turističke zajednice Kantona)

- (1) Direktor turističkog ureda organizuje i vodi rad i poslovanje Turističke zajednice Kantona, zastupa Turističku zajednicu Kantona, poduzima sve pravne radnje u ime i za račun Turističke zajednice Kantona u svim postupcima pred sudovima, upravnim i drugim tijelima, te pravnim osobama sa javnim ovlastima.
- (2) Direktor turističkog ureda odgovoran je za zakonitost rada Turističke zajednice Kantona.
- (3) Direktor turističkog ureda odgovara za svoj rad turističkom vijeću.
- (4) Statutom Turističke zajednice Kantona utvrđuje se koje odluke donosi direktor turističkog ureda samostalno, a koje uz saglasnost turističkog vijeća.

- (5) Direktor se imenuje na period od četiri godine, javnim konkursom u skladu sa Zakonom o ministarskim, vladinim i drugim imenovanjima u Federaciji BiH i može biti imenovan najviše na još jedan mandat.
- (6) Direktor Turističkog ureda treba da ispunjava sljedeće uslove:
 - a) VSS -VII/1 stepen stručne spreme prirodnog ili društvenog smjera, odnosno visoko obrazovanje najmanje drugog ciklusa diplomskog univerzitetskog studija, Bolonjskog sistema studiranja koji se vrednuje sa najmanje 300 ECTS bodova,
 - b) najmanje pet godina radnog iskustva u turizmu i ugostiteljstvu, od čega najmanje tri godine na rukovodećim poslovima,
 - c) aktivno znanje stranog jezika.

POGLAVLJE III. TURISTIČKA ZAJEDNICA OPĆINE/GRADA

Član 23.

(Odluka o osnivanju turističke zajednice općine/grada)

- (1) U općini/gradu, može se osnovati turistička zajednica općine/grada, na osnovu prethodne saglasnosti Ministarstva.
- (2) Pripremne radnje za osnivanje turističke zajednice općine/grada i sazivanje osnivačke skupštine obavlja nadležna općinska/gradska služba.
- (3) Zahtjev za davanje saglasnosti za osnivanje turističke zajednice općine/grada Ministarstvu podnosi općinski načelnik/gradonačelnik, uz prethodnu saglasnost općinskog/gradskog vijeća.
- (4) Zahtjevu iz stava (3) ovoga člana prilaže se pismo namjere za osnivanje turističke zajednice općine /grada, obim unutrašnje organizacije turističke zajednice općine/grada i procjena izvornih prihoda potrebnih za rad turističke zajednice općine/grada, kao i izvori obezjeđenja istih.
- (5) Prilikom davanja saglasnosti iz stava (3) ovoga člana, Ministarstvo će posebno voditi računa o mogućnostima finansiranja predloženog obima organizacije i finansijskim mogućnostima izvršavanja osnovnih zadataka turističke zajednice općine/grada.
- (6) Sjedište turističke zajednice općine/grada je u mjestu sjedišta općine/grada, ukoliko osnivačka skupština turističke zajednice općine/grada ne odluči drugačije.

Član 24.

(Zadaci turističke zajednice općine/grada)

- (1) Osnovni zadaci turističke zajednice općine/grada su sljedeći:
 - a) poticanje, unapređivanje i promicanje izvornih vrijednosti (tradicije, običaja, etnološko blago i sl.) turističkog područja kojemu pripada općina i stvaranje uslova za njezino privredno korištenje,
 - b) saradnja i koordinacija s pravnim i fizičkim osobama, koje su neposredno ili posredno uključene u turistički promet, radi zajedničkog dogovaranja, utvrđivanja i provedbe politike razvoja turizma i njegove promocije u okviru sveobuhvatne politike privrednog razvoja općine ili grada,

- c) poticanje, koordinacija i organizacija kulturnih, umjetničkih, privrednih, sportskih i drugih priredbi koje pridonose obogaćivanju turističke ponude mjesta i općine,
 - d) poticanje zaštite, održavanja i obnove kulturno-historijskih spomenika i drugih materijalnih dobara od interesa za turizam, njihovo uključivanje u turističku ponudu,
 - e) poticanje i organiziranje akcija u cilju očuvanja turističkog prostora, unaprijeđenje turističkog okruženja i zaštite čovjekova okoliša na području općine,
 - f) poticanje i pomaganje razvoja turizma i u mjestima, na području općine, koja nije turistički razvijena,
 - g) izrada programa i planova promocije u skladu sa koncepcijom i smjernicama promocije turizma Kantona,
 - h) organizacija, provođenje i nadzor svih radnji promocije turističkog proizvoda općine/grada u skladu sa smjernicama skupštine turističke zajednice, godišnjem programu rada i finansijskom planu turističke zajednice općine/grada,
 - i) vođenje jedinstvenog popisa turista za područje općine/grada, naročito radi kontrole naplate boravišne takse i stručne obrade podataka,
 - j) dnevno prikupljanje, sedmična i mjesečna obrada podataka o turističkom prometu na području turističkih mjesta u općini/gradu i na području turističke zajednice u cjelini, te prikupljanje i obrada svih drugih pokazatelja bitnih za praćenje izvršenja postavljenih ciljeva i zadaća, te njihovo dostavljanje Turističkoj zajednici Kantona,
 - k) izrada izvještaja o izvršenju zadaća, analiza i ocjena ostvarenja programa rada i finansijskog plana turističke zajednice općine/grada,
 - l) stvaranje uslova za aktiviranje turističkih resursa na teritoriji općine/grada;
 - m) realizovanje programa aktivnosti boravka studijskih grupa i novinara na teritoriji svog djelovanja,
 - n) pružanje servisnih usluga i informacija gostima,
 - o) organizovanje turističko-informativnih biroa,
 - p) saradnja sa organima i tijelima općine/grada u cilju donošenja i sprovođenja lokalnih mjera za poboljšanje uslova boravka turista na teritoriji općine/grada,
 - r) saradnja sa lokalnim udruženjima i nevladinim zajednicama iz oblasti turizma i ugostiteljstva i njima komplementarnim djelatnostima,
 - s) saradnja sa drugim lokalnim turističkim zajednicama u Kantonu, Federaciji i Bosni i Hercegovini,
 - t) sprovođenje anketa i drugih istraživanja u cilju utvrđivanja ocjene kvaliteta turističkog proizvoda na teritoriji općine/grada,
 - u) izrada izvještaja i informacija za potrebe Turističke zajednice Kantona,
 - v) obavljanje i drugih poslova u cilju promocije turističkog proizvoda na teritoriji općine/grada.
- (2) Turističke zajednice općine/grada sudjeluju u provedbi programa i akcijama Turističke zajednice Kantona od zajedničkog interesa za sve subjekte u turizmu s područja Kantona.

Član 25.

(Obavezni članovi turističke zajednice općine/grada)

- (1) Obavezni članovi turističke zajednice općine/grada postaje svaka pravna i fizička osoba, koja na području općine/grada u kojoj se osniva turistička zajednica općine ima svoje sjedište ili podružnicu, pogon, filijalu ili sl. (u daljem tekstu: poslovna jedinica), a koja ostvaruje prihod obavljanjem ugostiteljskih i turističkih, te s turizmom neposredno povezanih djelatnosti.
- (2) Odredbe ovog zakona primjenjuju se i na podružnice, predstavništva i sl., stranih fizičkih i pravnih osoba, koje imaju sjedište u turističkom mjestu.
- (3) Djelatnosti iz stava (1) ovog člana utvrdit će se na način propisan članom 19. stav (2) ovog zakona.
- (4) Obavezno članstvo u turističkoj zajednici općine/grada počinje danom osnivanja turističke zajednice općine/grada ili danom početka obavljanja djelatnosti pravne i fizičke osobe na području općine/grada na kojem je osnovana turistička zajednica.
- (5) Na prestanak obaveznog članstva u turističkoj zajednici ne utječe privremena obustava djelatnosti kao ni sezonsko obavljanje djelatnosti.
- (6) Obavezno članstvo u turističkoj zajednici općine/grada prestaje prestankom postojanja turističke zajednice ili prestankom obavljanja djelatnosti člana turističke zajednice.
- (7) Obavezni članovi turističke zajednice općine/grada, odnosno njihovi predstavnici, mogu birati i biti birani u tijela turističke zajednice općine grada.

Član 26.

(Dobrovoljni članovi turističke zajednice općine/grada)

- (1) Kao dobrovoljni članovi u turističku zajednicu općine/grada mogu se učlaniti pravne i fizičke osobe koje nisu članovi turističke zajednice u skladu sa članom 25. stav (1) ovoga zakona.
- (2) O zahtjevu lica iz stava (1) ovog člana odlučuje skupština turističke zajednice.
- (3) Dobrovoljni članovi imaju ista prava i obaveze kao i obavezni članovi.

Član 27.

(Skupština turističke zajednice općine/grada)

- (1) Skupštinu turističke zajednice općine/grada čine pravne i fizičke osobe članovi turističke zajednice općine/grada.
- (2) Ako zbog mnogobrojnosti nema mogućnosti da svaki član turističke zajednice bude predstavljen u skupštini, tada skupštinu čine predstavnici članova, tako da svaki predstavnik u skupštini predstavlja određeni broj članova iz odgovarajuće djelatnosti u općini/gradu u skladu sa statutom.
- (3) Broj predstavnika članova skupštine iz stava (2) ovoga člana utvrđuje se statutom turističke zajednice općine/grada razmjerno visini udjela odgovarajuće djelatnosti u prihodu turističke zajednice s tim da jedna djelatnost može imati maksimalno 35% predstavnika u skupštini.
- (4) Kao udio u prihodu turističke zajednice iz stava (3) ovoga člana, računaju se članski doprinos i boravišna taksa koje su od strane fizičkih i pravnih lica iz određene

djelatnosti uplaćene u korist turističke zajednice općine/grada u godini koja prethodi godini u kojoj se provode izbori za skupštinu turističke zajednice općine/grada.

- (5) Ako tokom mandata dođe do promjene udjela u prihodima za više od 10%, broj predstavnika članova skupštine iz stava (2) iznova će se utvrditi prema stavu (3) ovoga člana.
- (6) Promjenu iz stava (5) ovoga člana utvrđuje skupština turističke zajednice općine/grada istodobno s usvajanjem godišnjeg finansijskog izvještaja.
- (7) Pored nadležnosti skupštine iz člana 11. ovoga zakona skupština turističke zajednice općine/grada:
 - a) bira predstavnike u skupštinu Turističke zajednice Kantona iz redova svojih članova,
 - b) donosi odluku o osnivanju turističko-informativnih biroa.

Član 28.

(Turističko vijeće turističke zajednice općine /grada)

- (1) Turističko vijeće Turističke zajednice općine/grada čine predsjednik, članovi koje bira skupština iz reda članova turističke zajednice, na način da se obezbijedi srazmjerna zastupljenost članova pojedinih djelatnosti u turističkom vijeću, prema njihovom učešću u ukupnom prihodu turističke zajednice i predstavnik nadležnog organa lokalne samouprave.
- (2) Broj članova turističkog vijeća turističke zajednice općine/grada utvrđuje se statutom.

Član 29.

(Direktor turističkog ureda turističke zajednice općine/grada)

- (1) Direktor turističkog ureda organizuje i vodi rad i poslovanje turističke zajednice općine/grada, zastupa turističku zajednicu općine/grada, poduzima sve pravne radnje u ime i za račun turističke zajednice općine/grada u svim postupcima pred sudovima, upravnim i drugim tijelima, te pravnim osobama sa javnim ovlastima.
- (2) Direktor turističkog ureda odgovoran je za zakonitost rada turističke zajednice općine/grada.
- (3) Direktor turističkog ureda odgovara za svoj rad turističkom vijeću općine/grada
- (4) Statutom turističke zajednice općine/grada utvrđuje se koje odluke donosi direktor turističkog ureda samostalno, a koje uz saglasnost turističkog vijeća.
- (5) Direktor se imenuje na period od četiri godine, javnim konkursom u skladu sa Zakonom o ministarskim, vladinim i drugim imenovanjima u Federaciji BiH i može biti imenovan najviše na još jedan mandat.
- (6) Direktor turističkog ureda mora da ispunjava sljedeće uvjete:
 - a) VSS -VII/1 stepen, prirodnog ili društvenog smjera, odnosno visoko obrazovanje najmanje drugog ciklusa diplomskog univerzitetskog studija, Bolonjskog sistema studiranja, koji se vrednuje sa najmanje 300 ECTS bodova.
 - b) najmanje pet godina radnog iskustva u turizmu i ugostiteljstvu, od čega najmanje tri godina na rukovodećim poslovima;
 - c) aktivno znanje stranog jezika.

POGLAVLJE IV. KATEGORIZACIJA TURISTIČKIH MJESTA

Član 30. (Kategorizacija turističkog mjesta)

- (1) Osnov ukupnog sistema turističkih zajednica definisanog ovim zakonom čine općine/ gradovi, koje se, shodno svom značaju za turizam, razvrstavaju u kategorije turističkih mjesta.
- (2) Osnovni kriterijumi za kategorizaciju turističkih mjesta su:
 - a) trogodišnji prosjek ostvarenog broja turističkih noćenja u turističkom mjestu (broj noćenja),
 - b) broj noćenja iz tačke a) ovog stava po stanovniku turističkog mjesta (koeficijent intenziteta turističkog prometa),
 - c) ukupna vrijednost prometa u turističkoj i ugostiteljskoj djelatnosti po stanovniku mjesta (koeficijent specifičnog turističkog prometa).
- (3) Shodno kriterijima iz stava (2) ovog člana turistička mjesta se razvrstavaju u kategorije A, B, C i D.
- (4) Bliže kriterije, način vrednovanja kriterija za kategorizaciju turističkih mjesta i način određivanja kategorije turističkih mjesta na području Kantona propisuje Ministar.

Član 31. (Komisija)

- (1) Ministar Rješenjem imenuje Komisiju za proglašenje kategorije turističkog mjesta.
- (2) Ministar, na prijedlog Komisije iz stava (1) ovog člana, donosi rješenje o proglašenju i kategorizaciji područja jedinice lokalne samouprave, kao turističkog mjesta.
- (3) Rješenje iz stava (2) ovog člana podliježe reviziji nakon isteka roka od pet godina od dana njegovog dostavljanja.

POGLAVLJE V. FINANSIRANJE TURISTIČKIH ZAJEDNICA

Član 32. (Prihodi)

- (1) Turističke zajednice finansiraju se iz sljedećih izvora:
 - a) boravišne takse,
 - b) članskog doprinosa,
 - c) budžeta općine, odnosno Kantona,
 - d) zajmova,
 - e) dobrovoljnih priloga,
 - f) imovine u vlasništvu,
 - g) prihodi od obavljanja privrednih djelatnosti iz člana 5. stava (2) ovoga zakona.

- (2) Pored izvora finansiranja navedenih u stavu (1) ovog člana, poslovanje ili pojedine aktivnosti turističke zajednice mogu se finansirati i dodatnim sredstvima koja osiguravaju njihovi članovi i druge zainteresovane organizacije.
- (3) Turistička zajednica se može, na osnovu posebne odluke turističkog vijeća, finansijski zaduživati u cilju realizacije programa rada i finansijskog plana, ali ukupna vrijednost zaduženja ne smije prelaziti 25% finansijskim planom predviđenih prihoda.

Odjeljak A. Boravišna taksa

Član 33.

(Obveznici plaćanja boravišne takse)

- (1) Boravišna taksa je paušalni novčani iznos koji plaća lice koje izvan svog prebivališta koristi usluge smještaja u smještajnom objektu u kojem se obavlja turistička ili ugostiteljska djelatnost (u daljem tekstu: smještajni objekat).
- (2) Smještajnim objektom, u smislu stava (1) ovog člana, smatra se: hotel, motel, hostel, pansion, turistički apartman, odmaralište, kamp, bungalovi, planinarski dom, soba za iznajmljivanje i svi drugi objekti u kojima se pružaju usluge smještaja.
- (3) Lica iz stava (1) ovog člana boravišnu taksu plaćaju pravnom ili fizičkom licu s kojim su ugovorile pružanje usluga smještaja. Izuzetno od stava (1) ovog člana lica koja pružaju ugostiteljske usluge smještaja u domaćinstvu (lica u domaćinstvu) plaćaju godišnji paušalni iznos boravišne takse za svaki krevet i smještajnu jedinicu koji se koristi za pružanje usluga smještaja u skladu sa propisima o pružanju usluga smještaja. Na dodatne (pomoćne) krevete ne plaća se godišnji paušalni iznos boravišne takse.
- (4) Dnevnu boravišnu taksu plaća organizator grupnog putovanja-agencija, po svakom grupnom dolasku turista u turističko mjesto bez noćenja.
- (5) Boravišnu taksu i dnevnu boravišnu taksu pod jednakim uslovima plaćaju domaći i strani državljani.

Član 34.

(Oslobađanja od obaveze plaćanja boravišne takse)

- (1) Boravišnu taksu ne plaćaju:
 - a) djeca do 12 godina starosti,
 - b) lica sa teškim čulnim i tjelesnim smetnjama (slijepi, gluhi, distrofičari i dr.);
 - c) lica upućena na banjska i klimatska liječenja, odnosno specijalizovanu rehabilitaciju od nadležne ljekarske komisije,
 - d) lica koja obavljaju sezonske poslove sa prijavljenim boravkom u turističkom mjestu,
 - e) lica koja neprekidno borave u objektu za smještaj duže od 30 dana,
 - f) učesnici školskih ekskurzija, odnosno učenici i studenti čiji boravak organizuju škole i fakulteti u okviru redovnih programa, održavanja sportskih i kulturnih manifestacija,

- g) strani državljani koji su po međunarodnim konvencijama i sporazumima oslobođeni plaćanja taksi,
 - h) strani državljani koji organizovano, preko zvaničnih humanitarnih organizacija, dolaze radi pružanja humanitarne pomoći.
- (2) Lica iz stava (1) ovog člana ne plaćaju boravišnu taksu ako podnesu dokaz o ispunjavanju uslova utvrđenih u istom stavu (članska karta, potvrda škole, ljekara, ljekarsku uputnicu i dr.).
- (3) Boravišnu taksu umanjenu za 50% plaćaju lica od 12 do 18 godina starosti.
- (4) Dnevnu boravišnu taksu ne plaćaju:
- a) djeca do 12 godina starosti,
 - b) lica sa teškim čulnim i tjelesnim smetnjama (slijepi, gluhi, distrofičari i dr),
 - c) učesnici školskih ekskurzija, odnosno učenici i studenti čiji boravak organizuju škole i fakulteti u okviru redovnog programa, održavanja sportskih i kulturnih manifestacija,
 - d) Strani državljani koji su po međunarodnim konvencijama i sporazumima oslobođeni plaćanja taksi,
 - e) strani državljani koji organizovano, preko zvaničnih humanitarnih organizacija dolaze radi pružanja humanitarne pomoći.

Član 35.

(Visina i način naplate boravišne takse)

- (1) Visinu boravišne takse, na prijedlog Ministarstva, utvrđuje Vlada Kantona najkasnije do kraja oktobra tekuće godine za narednu godinu.
- (2) Naplatu boravišne takse vrši pravno i fizičko lice koje pruža usluge smještaja (u daljem tekstu: davalac usluga).
- (3) Davalac usluga naplaćuje boravišnu taksu istovremeno sa naplatom usluge smještaja.
- (4) Ako davalac usluga ne naplati boravišnu taksu, dužan je da na svoj teret uplati iznos nenaplaćene boravišne takse.
- (5) Dnevna boravišna taksa iz člana 33. stav (4) ovog zakona iznosi 50% boravišne takse.

Član 36.

(Evidencija boravišne takse)

- (1) Davalac usluga je dužan da u račun za usluge smještaja posebno iskaže iznos boravišne takse, a u slučajevima iz člana 34. stav (1) i (3) ovog zakona da navede osnov oslobađanja od plaćanja boravišne takse, odnosno osnov za plaćanje umanjene takse.
- (2) Davalac usluga vodi evidenciju o uplaćenju taksi u knjizi, odnosno drugoj odgovarajućoj evidenciji.
- (3) Davalac usluga je dužan da nadležnoj kantonalnoj inspekciji, Ministarstvu i Turističkoj zajednici kantona do 15-og u mjesecu za prethodni mjesec dostavi izvještaj o broju korisnika usluga smještaja i iznosu naplaćene boravišne takse.

Član 37.

(Prijava i odjava turista)

- (1) Davalac usluga koji pruža usluge smještaja u smještajnim objektima iz člana 33. stav (1) i (2) ovog Zakona dužan je u roku od 24 sati po dolasku prijaviti i po odlasku odjaviti Turističkoj zajednici Kantona sva lica kojima se pruža usluga noćenja u smještajnom objektu.
- (2) Oblik i sadržaj obrasca prijave boravka građana koji se koriste uslugama noćenja u smještajnim objektima, te sadržaj i način vođenja evidencije o boravku građana u smještajnim objektima propisat će Ministar.

Član 38.

(Način korištenja i raspoređivanja sredstava boravišne takse)

- (1) Sredstva prikupljena po osnovu boravišne takse i dnevne boravišne takse, isključivo se koriste za razvoj i unaprijeđenje turističke ponude jedinice lokalne samouprave i Kantona.
- (2) Sredstva od naplaćene boravišne takse davalac usluga dužan je uplatiti na račun Turističke zajednice Kantona, prvog radnog dana naredne sedmice za proteklu sedmicu.
- (3) Turistička zajednica Kantona dužna je 70% naplaćenih sredstava od boravišne takse vratiti na račun općinske/gradske turističke zajednice u roku od sedam dana od dana uplate od strane davaoca usluga.
- (4) Sredstva iz stava (1) ovog člana koristit će se na osnovu usvojenog programa utroška sredstava.

Odjeljak B. Članski doprinos i ostali prihodi

Član 39.

(Obveznici plaćanja)

- (1) Članski doprinos turističkoj zajednici dužni su plaćati obavezni članovi turističke zajednice iz člana 19. stav (1) tačka b) ovog Zakona.
- (2) Pravna osoba, obavezni član turističke zajednice, koja se s više od 50% finansira iz općinskog/gradskog, kantonalnog, entitetskog ili državnog budžeta ne plaća članski doprinos turističkoj zajednici.
- (3) Dobrovoljni članovi turističke zajednice općine plaćaju članski doprinos turističkoj zajednici u visini koju utvrdi skupština turističke zajednice.

Član 40.

(Visina članskog doprinosa)

- (1) Visina članskog doprinosa koji plaća pravna i fizička osoba kao obavezni član Turističke zajednice Kantona ili općine/grada, ovisi o:

- a) kategoriji turističkog mjesta u kojem je sjedište ili organizaciona jedinica,
 - b) pravnom statusu obveznika (pravna ili fizička osoba),
 - c) stopi na ukupni prihod utvrđenoj ovim zakonom.
- (2) Zavisno od kategorije turističkog mjesta obveznici plaćanja plaćaju članski doprinos po sljedećim procentima:

Kategorija turističkog mjesta	A	B	C	D
Pravna osoba	0,05	0,04	0,03	0,02
Fizička osoba	0,025	0,02	0,015	0,01

Član 41.

(Osnovica za obračun članskog doprinosa)

- (1) Osnovica za obračun članskog doprinosa za pravne i fizičke osobe iz člana 39. stav (1) ovog zakona koje su obveznici plaćanja poreza na dobit jest ukupni prihod koji čine svi prihodi koje su te osobe dužne iskazati u računu dobiti i gubitaka, u skladu sa propisima o računovodstvu.
- (2) Osnovica za obračun članskog doprinosa za fizičke osobe iz člana 39. stav (1) koje su obveznici plaćanja poreza na dohodak su ukupni primici iz knjige primitaka i izdataka u skladu sa propisima o porezu na dohodak, umanjeni za naplaćeni porez na dodatnu vrijednost.
- (3) Za svaki organizacioni oblik izvan sjedišta pravne i fizičke osobe utvrđuje se posebna osnovica i ukupni prihod za obračun članskog doprinosa.
- (4) Pravnoj i fizičkoj osobi smanjuje se osnovica za obračun članskog doprinosa za dio njezinoga ukupnog prihoda ostvarenog u organizacionim jedinicama koje se nalaze izvan turističkog mjesta u kojem je sjedište pravne i fizičke osobe.

Član 42.

(Način plaćanja članskog doprinosa)

- (1) Pravna osoba plaća članski doprinos Turističkoj zajednici Kantona i turističkoj zajednici općine/grada u kojoj ima registrovano sjedište.
- (2) Pravna osoba koja ima bilo kakvu organizacionu jedinicu izvan registrovanog sjedišta plaća dio članskog doprinosa Kantonu i općinama/gradovima u kojima organizacione jedinice obavljaju djelatnost, srazmjerno učešću organizacione jedinice u ukupnom prometu pravne osobe.
- (3) Fizička osoba plaća članski doprinos prema sjedištu nadležnog organa koji je izdao odobrenje za obavljanje djelatnosti.
- (4) Obveznici plaćanja članskog doprinosa dužni su do 15-og u mjesecu izvršiti obračun i uplatu članskog doprinosa za prethodni mjesec na račun Turističke zajednice Kantona.

- (5) Uz uplatu članskog doprinosa obveznici su dužni dostaviti obrazac obračuna iz koga je jasno vidljivo kojoj općini/gradu, odnosno području pripada obračunati i uplaćeni članski doprinos.
- (6) Izgled i sadržaj obrasca iz stava (5) ovog člana propisat će Ministar.

Član 43.

(Raspoređivanje članskog doprinosa)

- (1) Sredstva prikupljena po osnovu članskog doprinosa raspoređuju se na način da:
- 70% sredstava pripada turističkoj zajednici općine/građa, ukoliko je osnovana,
 - 30% sredstava pripada Turističkoj zajednici Kantona.
- (2) Turistička zajednica Kantona u roku od pet dana od dana uplate raspoređuje sredstva prikupljena po osnovu članskog doprinosa shodno odredbama iz stava (1) ovog člana.
- (3) Ukoliko nije osnovana turistička zajednica općine/građa, sredstva prikupljena po osnovu članskog doprinosa predstavljaju prihod Turističke zajednice Kantona.
- (4) Turističke zajednice dužne su ostvarena sredstva koja im pripadaju od članskog doprinosa turističkim zajednicama rasporediti na sljedeći način:
- 40% za unapređenje turizma,
 - 15% namjenski očuvanje, zaštitu i obnavljanje prirodne baštine i kulturno-historijskog naslijeđa koji imaju turistički karakter i turistički potencijal.

Sredstva iz stava (4) tačka a) ovog člana raspoređuju se na osnovu usvojenog programa rada i finansijskog plana.

Sredstva iz stava (4) tačka b) ovog člana raspoređuju se na osnovu odluke Vlade kantona, a na prijedlog nadležnog ministarstva.

Član 44.

(Ostali prihodi)

Prihodi koje ostvari turistička zajednica u skladu sa članom 32 stav (1) tačka g) i stav (2) pripadaju u punom iznosu, turističkoj zajednici koja je ostvarila navedene prihode.

POGLAVLJE VI. GOSPODARENJE U TURISTIČKIM ZAJEDNICAMA

Član 45.

(Godišnji program rada i finansijski plan)

- (1) Za svaku poslovnu godinu turistička zajednica utvrđuju program rada i finansijski plan.
- (2) Prijedlog programa rada i prijedlog finansijskog plana za sljedeću poslovnu godinu, podnosi turističko vijeće skupštini turističke zajednice, do kraja mjeseca novembra tekuće godine.
- (3) Prijedlog programa rada i prijedlog finansijskog plana za sljedeću poslovnu godinu turistička zajednica općine/grada dostavlja Turističkoj zajednici Kantona do kraja mjeseca oktobra tekuće godine.
- (4) Skupština Turističke zajednice Kantona donosi godišnji plan rada i finansijski plan uz predhodnu saglasnost Ministarstva, a turističke zajednice općina/grada uz predhodnu saglasnost načelnika/gradonačelnika.

Član 46.

(Sadržaj programa rada i finansijskog plana)

- (1) Godišnji program rada i godišnji finansijski plan turističke zajednice, obavezno sadrže pojedinačno utvrđene planirane zadatke i potrebna sredstva za njihovo izvršenje.
- (2) Prijedlog programa rada i finansijskog plana iz stava (1) ovog člana, obavezno se dostavljaju na razmatranje članovima skupštine turističke zajednice osam dana prije održavanja sjednice na kojoj se isti donose.
- (3) Skupština Turističke zajednice kantona donosi godišnji program i finansijski plan uz saglasnost Ministarstva.

Član 47

(Izmjene i dopune programa rada i finansijskog plana)

- (1) Tokom godine turistička zajednica može mijenjati i dopunjavati svoj program rada i godišnji finansijski plan.
- (2) Ako tokom godine dođe do odstupanja od utvrđenog programa rada i finansijskog plana turistička zajednica je dužna donijeti izmjene, odnosno dopune programa rada i finansijskog plana.
- (3) Izmjene programa rada i finansijskog plana iz stava (1) i (2) ovoga člana obavljaju se na način i prema postupku kojim se donosi program rada i finansijski plan.

Član 48.

(Godišnji finansijski izvještaj)

- (1) Prijedlog godišnjeg finansijskog izvještaja za prethodnu godinu turističko vijeće podnosi skupštini turističke zajednice.
- (2) Prijedlog godišnjeg finansijskog izvještaja mora se staviti na uvid članovima turističke zajednice osam dana prije razmatranja na skupštini turističke zajednice.

- (3) Godišnji finansijski izvještaj turistička zajednica općine/grada dostavlja Turističkoj zajednici Kantona.
- (4) Skupština turističke zajednice dužna je do kraja marta tekuće godine usvojiti godišnji finansijski izvještaj za prethodnu godinu.
- (5) Prijedlog godišnjeg finansijskog izvještaja za prethodnu godinu turističko vijeće podnosi skupštini turističke zajednice do 15.marta tekuće godine.
- (6) Godišnji finansijski izvještaj za prethodnu godinu turističke zajednice općina/gradova dužne su dostaviti Turističkoj zajednici Kantona. Turistička zajednica Kantona dužna je svoj i izvještaje turističkih zajednica općina /grada dostaviti Ministarstvu do kraja aprila tekuće godine.
- (7) Godišnji finansijski izvještaj obavezno sadrži podatke o izvršenju programa rada pojedinačno utvrđenih zadataka, izdacima njihovog izvršenja, izdacima za poslovanje turističkog ureda i rad organa turističke zajednice, ostvarenju prihoda po izvorima, finansijskom rezultatu poslovanja, uporedbu finansijskog plana i njegovog ostvarenja s obrazloženjem odstupanja, analizu i ocjenu izvršenja programa, te procjenu učinka poduzetih aktivnosti na razvoj turizma, kao i nalaz ovlaštene revizorske kuće.

POGLAVLJE VII. NADZOR

Član 49.

(Nadzor od Ministarstva)

- (1) Ministarstvo obavlja nadzor nad provođenjem odredaba ovoga zakona, te drugih propisa kojima se uređuje organizovanje i poslovanje turističkih zajednica na području Kantona.
- (2) Ministarstvo može naložiti Turističkoj zajednici Kantona provođenje nadzora nad turističkim zajednicama općina/gradova i obavezno dostavljanje izvještaja odmah po izvršenom nadzoru.
- (3) U provedbi nadzora Ministarstvo posebno nadzire:
 - a) zakonitost organizacije, rada i postupanja organa turističkih zajednica,
 - b) zakonitost akata turističkih zajednica,
 - c) izvršavanje zadataka turističkih zajednica i namjensko trošenje sredstava.
 - d) zakonitosti rada i postupanja zaposlenika turističkog ureda turističke zajednice.

Član 50.

(Provedba nadzora)

- (1) U provedbi nadzora Ministarstvo može zahtijevati izvještaje, podatke, materijale i druge obavijesti od turističkih zajednica.
- (2) Turističke zajednice dužne su omogućiti Ministarstvu, provedbu nadzora, te im dostaviti ili pripremiti tačne i potpune izvještaje, podatke i druge materijale i obavijesti iz stava (1) ovoga člana.

Član 51.
(Mjere za otklanjanje uočenih nepravilnosti)

Ako u provedbi nadzora Ministarstvo utvrdi da postoje nezakonitosti ili nepravilnosti, poduzet će mjere u svrhu otklanjanja uočenih nezakonitosti ili nepravilnosti, na način da:

- a) naloži mjere koje se moraju poduzeti radi otklanjanja utvrđenih nezakonitosti ili nepravilnosti i odrediti za to primjeren rok,
- b) naloži pokretanje postupka za utvrđivanje odgovornosti voditelja i odgovornog zaposlenika turističkog ureda.

Član 52
(Raspuštanje skupštine turističke zajednice)

- (1) Osnivač može donijeti odluku o raspuštanju skupštine turističke zajednice:
 - a) ako donosi opće akte suprotno zakonu, Statutu ili drugom propisu, ili zbog povreda zakona i drugih propisa,
 - b) ako ne izabere članove turističkog vijeća u roku od 60 dana od dana konstituiranja, isteka njihovog mandata ili njihova razrješenja, odnosno od dana podnošenja ostavke,
 - c) ako ne donese godišnji program rada i finansijski plan, odnosno godišnji finansijski izvještaj u zakonski utvrđenom roku,
 - d) ako turistička zajednica ne ispunjava zadaće zbog kojih je osnovana.
- (2) Protiv rješenja iz stava (1) ovoga člana kod koga je osnivač Kanton, može se uložiti žalba Komisiji za drugostepeno upravno rješavanje u roku od 15 dana od dana dostave rješenja turističkoj zajednici.
- (3) Protiv rješenja iz stava (1) ovoga člana kod koga je osnivač općina/grad može se uložiti žalba organu nadležnom za drugostepeno upravno rješavanje, propisanim statutom općine/grada u roku od 15 dana od dana dostave rješenja turističkoj zajednici.

Član 53.
(Povjerenstvo)

- (1) Kada se raspusti skupština turističke zajednice, osnivač će rješenjem imenovati povjerenstvo u turističkoj zajednici.
- (2) Povjerenstvo osigurava djelovanje turističke zajednice i izvršavanje zakonom utvrđenih zadaća turističke zajednice do ustrojavanja novih organa turističke zajednice, te osigurava otklanjanje razloga zbog kojih je došlo do raspuštanja skupštine.

- (3) Danom dostave rješenja o imenovanju povjerenstva turističkoj zajednici, prestaju s radom svi organi turističke zajednice, a njihove ovlasti preuzima povjerenstvo.
- (4) Povjerenstvo može donositi ili mijenjati akte turističke zajednice samo ako je to potrebno radi provedbe zakona ili drugog propisa, ili usklađivanja sa zakonom ili drugim propisima.
- (5) Povjerenstvo ne može donositi ili mijenjati program rada ili finansijski plan i ne može raspolagati imovinom turističke zajednice, osim izvršenja isplate tekućih izdataka, te radi izvršenja prije preuzetih obaveza ili dovršenja prije započetih poslova.
- (6) Povjerenstvo je obavezno osigurati konstituisanje nove skupštine u roku od 60 dana od dana raspuštanja skupštine.
- (7) Protiv rješenja iz stava (1) ovoga člana kod koga je osnivač Kanton, može se uložiti žalba Komisiji za drugostepeno upravno rješavanje u roku od 15 dana od dana dostave rješenja turističkoj zajednici.
- (8) Protiv rješenja iz stava (1) ovoga člana kod koga je osnivač općina/grad može se uložiti žalba organu nadležnom za drugostepeno upravno rješavanje, propisanim statutom općine/grada u roku od 15 dana od dana dostave rješenja turističkoj zajednici.

Član 54.

(Inspekcijski nadzor)

- (1) Inspekcijski nadzor u provođenju ovog zakona i propisa donesenih na osnovu ovog zakona, te pojedinačnih akata, uslova i načina rada nadziranih turističkih zajednica, provodi Kantonalna ugostiteljsko-turistička inspekcija i druge inspekcije u okviru svoje nadležnosti.
- (2) Inspekcijski nadzor treba biti obavljen tako da ne ometa redovno obavljanje rada poslovanja.

POGLAVLJE VIII. PRESTANAK POSTOJANJA TURISTIČKE ZAJEDNICE

Član 55.

(Razlozi za prestanak postojanja Turističke zajednice)

- (1) Turistička zajednica prestaje:
 - a) odlukom skupštine uz saglasnost osnivača o prestanku postojanja turističke zajednice,

- b) rješenjem nadležnog ministarstva o zabrani djelovanja turističke zajednice:
- 1) ako turistička zajednica djeluje suprotno odredbama ovog zakona, Statuta ili ukoliko ne ispunjava zadatke zbog kojih je osnovana,
 - 2) ako je od održavanja skupštine turističke zajednice općine/grada ili Skupštine Turističke zajednice Kantona, proteklo dvostruko više vremena od vremena utvrđenog Statutom za održavanje skupštine turističke zajednice,
 - 3) kada se u roku od 60 dana od dana provedenih izbora ne formira skupština turističke zajednice i ako ne izvrši mjere koje je naložilo Ministarstvo.
- (2) Protiv rješenja iz stava (1) ovoga člana kod koga je osnivač Kanton, može se uložiti žalba Komisiji za drugostepeno upravno rješavanje u roku od 15 dana od dana dostave rješenja turističkoj zajednici.
- (3) Protiv rješenja iz stava (1) ovoga člana kod koga je osnivač općina/grad može se uložiti žalba organu nadležnim za drugostepeno upravno rješavanje, propisanim statutom općine u roku od 15 dana od dana dostave rješenja turističkoj zajednici.

Član 56.

(Okončanje djelovanja i raspolaganje imovinom u slučaju prestanka postojanja turističke zajednice)

- (1) Općina/grad u slučaju prestanka postojanja turističke zajednice općine/grada dužna je okončati poslove turističke zajednice općine/grada, koji su u toku.
- (2) Imovinu preostalu nakon namirenja povjerilaca u slučaju prestanka turističke zajednice općine/grada stječe općina/grad.
- (3) U slučaju prestanka postojanja Turističke zajednice Kantona Ministarstvo je dužno okončati poslove Turističke zajednice Kantona koji su u toku, a pravo raspolaganja imovinom koje preostanu stječe Vlada Kantona.

Član 57.

(Brisanje iz Upisnika)

- (1) Na osnovu odluke skupštine, odnosno pravomoćnog rješenja o zabrani djelovanja turističke zajednice Ministarstvo će brisati turističku zajednicu iz Upisnika.
- (2) Brisanjem iz Upisnika Turistička zajednica prestaje postojati.

POGLAVLJE IX. KAZNENE ODREDBE

Član 58.

- 1) Novčanom kaznom u iznosu od 2000,00 KM do 5.000,00 KM kaznit će se za prekršaj turistička zajednica ako:
 - a) Započne obavljati djelatnost prije nego što je upisana u sudski registar (čl.3. stav (2)),
 - b) Ne prijavi promjenu upisanih podataka (čl.3 stav (3)),

- c) Donese statut i /ili izmjene i dopune statuta bez prethodne saglasnosti (čl.9.stav. (3),
 - d) Ne objavi statut ili njegove izmjene i dopune (čl.9. stav (4)),
 - e) Ne ostvaruje zakonom utvrđene zadatke (član 18 i 24),
 - f) Ne donese godišnji program rada i finansijski plan na propisan način (čl. 45. stav (4),
 - g) Ne donese godišnji izvještaj o radu i finansijski izvještaj na propisan način. (čl. 48.)
 - h) Ne omogući Ministarstvu provedbu nadzora ili mu ne dostavi ili ne pripremi tačne i potpune izvještaje , podatke i druge materijale i obavijesti (čl. 50. stav (2)),
 - i) Ne otkloni nepravilnosti i nezakovitosti utvrđene nadzorom (čl. 51.),
- 2) Za prekršaje iz stava (1) ovog člana kaznit će se novčanom kaznom u iznosu od 500,00 KM do 2.500,00 KM i odgovorno lice u turističkoj zajednici.

Član. 59.

- (1) Novčanom kaznom od 3.000,00 KM do 10.000,00 KM kaznit će se za prekršaj pravno lice koje pruža usluge smještaja, ako:
- a) Ne naplati boravišnu taksu istovremeno sa naplatom usluge (čl. 35. stav (3)),
 - b) U računu posebno ne iskaže iznos boravišne takse ili ne navede osnov oslobađanja od njenog plaćanja (čl. 36. stav (1)),
 - c) Ne vodi ili netačno vodi evidenciju o uplaćenju taksi u knjizi, odnosno drugoj odgovarajućoj evidenciji (čl. 36. stav (2)),
 - d) U propisanom roku ne podnese nadležnom organu izvještaj o broju korisnika usluge smještaja i iznosu naplaćene boravišne takse (član 36. stav (3)),
 - e) Ne vrši prijavu i odjavu turista na propisan način (čl. 37.stav (1)),
 - f) Sredstva od naplaćene boravišne takse ne uplati u propisanom roku (čl. 38 stav (2),
- (2) Za prekršaj iz stava (1) ovog člana kaznit će se odgovorno lice u pravnom licu novčanom kaznom od 2000,00 KM do 5.000,00 KM.
- (3) Za prekršaj iz stava (1) ovog člana kaznit će se fizičko lice koje pruža usluge smještaja novčanom kaznom od 500,00 KM do 2.500,00 KM.

Član 60.

- (1) Novčanom kaznom u iznosu od 2.000,00 KM do 10.000,00KM kazniti će se za prekršaj pravno lice obveznik plaćanja članskog doprinosa ako:
- a) ne obračuna i u propisanom roku uplati članski doprinos (član 42. stav (4)),
 - b) uz uplatu članskog doprinosa (članarine) ne dostavi obrazac obračuna iz kojeg je jasno vidljivo kojoj općini/gradu pripada obračunati i uplaćeni članski doprinos. (član 42. stav (5)).

- (2) Za prekršaj iz stava (1) ovog člana kazniti će se odgovorno lice u pravnom licu novčanom kaznom od 2.000,00KM do 5.000,00 KM
- (3) Za prekršaj iz stava (1) ovog člana kazniti će se fizičko lice novčanom kaznom od 500,00 KM do 2.500,00 KM.

POGLAVLJE X. PRIJELAZNE I ZAVRŠNE ODREDBE

Član. 61.

Danom upisa u sudski registar Turističke zajednice Srednjobosanskog kantona prestaje sa radom dosadašnja Turistička zajednica Srednjobosanskog kantona.

Član. 62.

- (1) Danom početka rada Turističke zajednice Srednjobosanskog kantona, preuzeće se zaposlenici, arhiva i dokumentacija, sredstva rada kao i prava i obaveze turističke zajednice koja prestaje sa radom.
- (2) Nezavisna revizorska kuća će prethodno izvršiti reviziju finansijskog poslovanja i utvrditi finansijsko stanje turističke zajednice koja prestaje sa radom.

Član 63.

Postupci koji su pokrenuti prije stupanja na snagu ovog Zakona dovršit će se u skladu s propisima koji su važili do dana stupanja na snagu ovog zakona

Član 64.

- (1) Podzakonske akte i obrasce iz člana 3. stav(5), član 19. stav(2), člana 30. stav(4), člana 37. stav (2) i člana 42. stav (6), donijet će Ministar u roku od šest mjeseci od dana stupanja na snagu ovog zakona.
- (2) Odluku o visini boravišne takse donosi Vlada Kantona u roku od 30 dana, od dana stupanja na snagu ovog zakona.

Član 65.

Ovaj Zakon će biti usklađen sa federalnim Zakonom o turističkim zajednicama u roku od tri mjeseca, od dana stupanja na snagu federalnog zakona.

Član 66.

Ovaj Zakon stupa na snagu osmog dana od objavljivanja u "Službenim novinama Srednjobosanskog kantona".

Broj:
Travnik,

Predsjedavajući
Skupštine Srednjobosanskog kantona

Josip Kvasina, dipl. oec